

南華真經注疏

南華真經註疏卷之九

緣三

河 南 郭 象 註

唐 西 華 法 師 成 玄 英 疏

內篇應帝王第七

夫無心而任乎自化者應為帝王也

齧缺問於王倪四問而四不知

疏四問而四不知則齊物篇中四問也夫
帝王之道莫若忘知故以此義而為篇首
老子云不以智治國國之德者也

齧缺因躍而大喜行以告蒲衣子蒲衣子曰
而乃今知之乎

○疏蒲衣子堯時賢人年八歲舜師之讓位
不受即被衣子也齧缺得不知之妙旨仍
踊躍而喜歡走以告於蒲衣子迷王倪之
深義蒲衣是方外之大賢達忘言之至道
理無知而固久汝今日乃知也

卷三

一

有虞氏不及泰氏

註夫有虞氏之與泰氏皆世事之迹耳非
所以迹也所以迹者無迹也世孰名之哉
未之嘗名何勝負之有邪然無迹者乘群
變履萬世世有夷險故迹有不及也

疏有虞氏舜也泰氏即太昊伏羲也三皇
之世其俗淳和五帝之時其風澆競澆競
則運知而養物淳和則存真而馭寓不及
之義驗此可知也

有虞氏其猶臧仁以要人亦得人矣而未始
出於非人

註夫以人所好爲是人所惡爲非人者唯
以是非爲域者也夫能出於非人之域者
必入於無非人之境矣故無得無失無可
無不可豈直臧仁而要人也

○疏夫舜包臧仁義要求士庶以得百姓之心未是忘懷自合天下故出於是非之域亦有作臧字者臧善也善於仁義要求人心者也

泰氏其卧徐徐其覺于于

錄三

二

疏徐徐寬緩之容于于自得之貌伏犧之時淳風尚在故卧則安閑而徐緩覺則歡娛而自得也

一以已爲馬一以已爲牛

註夫如是又奚是人非人之有哉斯可謂

出於非人之域

䟽忘物我這是非或馬或牛隨人呼召人獸尚且無主何是非之有哉

其知情信

註任其自知故情信

䟽率其真知情無虛矯故實信也

其德甚真

註任其自得故無偽

䟽以不德爲德德無所德故不偽者也

○而未始入於非人

註不入乎是非之域所以絕於有虞之世
疏既率其情其德不僞故能超出心知之
境不入是非之域者也

肩吾見狂接輿狂接輿曰日中始何以語汝
疏肩吾接輿已具前解日中始賢人姓名
三
即肩吾之師也既是汝師有何告示此是
接輿發語以問故也

肩吾曰告我君人者以已出經式義度人孰
敢不聽而化諸

疏式用也教我爲君之道化物之方必須

己出智以經綸用仁義以導俗則四方氓庶誰不聽從遐遠黎元敢不歸化耶

狂接輿曰是欺德也

註以己制物則物失其真

疏夫以己制物物喪其真欺誑之德非實

道

其於治天下也猶涉海鑿河而使蚤負山也
註夫寄當於萬物則無事而自成以一身
制天下則功莫就而任不勝也

疏夫溟海宏博深廣難窮而穿之爲何必

無成理亦猶大道遐曠玄絕難知而鑒之
為義其功難克又蚩蟲至小山嶽極高今
其負荷無由勝任以智經綸用仁理物德
小謀大其義亦然

夫聖人之治也治外乎

註全其性分之內而已

䟽隨其分內而治之必不分外治物治乎
外者言不治之者也

正而後行

註各正性命

疏順其正性而後行化

確乎能其事者而已矣

註不爲其所不能

疏確實也順其實性於事有能者因而任之止於分內不論於外者耳

三

且鳥高飛以避矰弋之害鼯鼠深穴手神丘之下以避熏鑿之患

註禽獸猶各有以自存故帝王任之而不爲則自成也

○ 疏矰網也弋以繩係箭而射之也鼯鼠小

鼠也神丘杜壇也鳥則高飛而逃網鼠則
深穴而避薰斯皆率性自然豈待教而遠
害者也鳥鼠既耳在人亦然故知式義出
經証罔之甚矣

而曾二蟲之無知

註言汝曾不知此二蟲之各存而不待教
乎

疏而汝也汝不曾知此二蟲不待教令而
解避害全身者乎既深穴高飛豈無知耶
況在人倫而欲出經式義欺矯活物不亦

妄哉

天根遊於殷陽至蓼水之上適遭無名人而
問焉曰請問爲天下

疏天根無名並爲姓字寓言問答也殷陽
殷山之陽蓼水在趙國界內遭遇也天根
遨遊於山水之側適遇無名人而問之請
問之意在乎天下

無名人曰去汝鄙人也何問之不豫也

註問爲天下則非起於太初止於玄冥也
疏汝是鄙陋之人宜其速去所問之旨甚

不悅豫我心

予方將與造物者爲人

註任人之自爲

疏夫造物爲人素分各足何勞作法措意
治之既同於大通故任而不助也

厭則又乘夫莽眇之鳥以出六極之外而遊
無何有之鄉以處壖埌之野

註莽眇群碎之謂耳乘群碎馳萬物故能
出處常通而無狹滯之地

疏莽眇深遠之謂壖埌宏博之名鳥則取

其無迹輕昇六極猶六合也夫聖人馭世
恬淡無為大順物情有同造化若其息用
歸本厭離世間則乘深遠之大道凌虛空
而滅迹超六合以放任遊無有以逍遙凝
神智於射山處清虛於曠野如是則何天
下之可為哉蓋無為者也

汝又何帛以治天下感予之心為

註言皆放之自得之場則不治而自治也
疏夫放而任之則物皆自化有何帛術輒
欲治之感動我心何為如此

又復問

䟽天根未達更請決疑

無名人曰汝遊心於淡

註其任性而無所飾焉則淡矣

合氣於漠

錄三

六

註漠然靜於性而止

䟽可遊汝心神於恬淡之域合汝形氣於
寂寞之鄉唯形與神二皆虛靜如是則天
下不待治而自化者耳

順物自然而無容私焉而天下治矣

註任性自生公也心欲益之私也容私果
不足以生生而順公乃全也

䟽隨造化之物情順自然之本性無容私
作法術措意治之放而任之則物我全之
矣

陽子居見老聃曰有人於此嚮疾彊梁物徹
䟽明學道不勸如是者可比明王乎

䟽姓陽名朱字子居問老子明王之道假
且有人素性聰達神智捷疾猶如嚮應涉
事理務彊幹果決鑒物洞徹䟽通明敏學

道精勤曾無懈倦如是之人可得將明王
聖帝比德不乎

老聃曰是於聖人也胥易技係勞形怵心者
也

註言此功夫容身不得不足以比聖主

修三

七

疏若將彼人比聖主無易胥徒勞苦改易
形容技術工巧神慮係累劬勞故形容變
改係累故心靈怵惕也

且也虎豹之文來由獲狙之便執簾之狗來
藉如是者可比明王乎

註此皆以其文章技能係累其身非涉虛
以御乎無方也

䟽籍繩也獲狙獼猴也虎豹之皮有文章
故來田獵獼猴以跳躍便捷恒被繩拘狗
以執捉狐狸每遭係頸若以嚮疾之人類
於聖帝則此之三物可比明王也耳

陽子居楚然曰敢問明王之治

䟽既其失問故驚懷變容重請明王爲政
其義安在

○老聃曰明王之功蓋天下而似不自己

註天下若無明主則莫能自得今之自得
實明王之功也然功在無爲而還在天下
皆得自任故似非明王之功

疏夫聖人爲政功侔造化覆等玄天載同
厚地而功成不處故非已爲之也

化貸萬物而民弗恃

註夫明王皆就足物性故人人皆云我自
爾而莫知恃賴於明王

疏誘化蒼生令其去惡貸借萬物與其福
善而玄功潛被日用不知百姓謂我自然

不賴君之德

有莫舉名使物自喜

註雖有蓋天下之功而不舉以爲己名故
物皆自以爲得而喜

疏莫無也舉顯也推功於物不顯其名使

韓三

物各自得而惟喜適悅者也

立乎不測

註居變化之塗日新而無方

而遊於無有者也

註與萬物爲體則所遊者虛也不能冥物

○ 則迂物不暇何暇遊虛哉

疏無有妙本也樹德立功神妙不測而即迹即本故常遊心於至極也

鄭有神巫曰季咸

疏鄭國有神異之巫甚有靈驗從齊而至

姓季名咸耳

知人之死生存亡禍福壽夭期以歲月旬日若神鄭人見之皆棄而走

註不喜自聞死日也

疏占候吉凶必無差失剋定時日驗若鬼

神不喜預而聞凶禍是以棄而走避也

列子見之而心醉歸以告壺子

疏列子事迹具逍遙篇今不重解壺子鄭
之得道人也號壺子名林即列子之師也
列子見季咸小術驗若鬼神中心羨仰恍
然如醉既而歸反具告其師

曰始吾以夫子之道爲至矣則又有至焉者
矣

註謂季咸之至又過於夫子

○ 疏夫子壺子也至極也初始稟學先生之
○

道爲至今見季咸其道又極於夫子此是
御寇心醉之言也

壺子曰吾與汝既其文未既其實而固得道
與

疏與授也既盡也吾比授汝始盡文言於
其妙理余未造實汝固執文字謂言得道
豈知筌蹄異於魚兔耶

衆雌而無雄而又奚卵焉

註言列子之未懷道也

疏夫衆雌無雄無由得卵既文無實亦何

道之有哉

而以道與世亢必信夫故使人得而相汝
註未懷道則有心有心而亢其一方以必
信於世故可得而相之

疏汝用文言之道而與世間亢對既無大
智必信彼小巫是故季咸得而相汝者也
嘗試與來以予示之

疏夫至人凝遠神妙難知本迹寂動非凡
能測故召令至以我示之也

明日列子與之見壺子出而謂列子曰嘻子

之先生死矣弗活矣不以旬數矣吾見怪焉。
見濕灰焉。

䟽嘻聲也子林示其寂泊之容季咸謂其
將死先怪已彰不過十日弗活之兆類彼
濕灰也

列子人泣涕沾襟以告壺子壺子曰擲吾示
之以地文萌乎不震不正

卷三

十

註萌然不動亦不自正與枯木同其不華
濕灰均於寂魄此乃至人無感之時也夫
至人其動也天其靜也地其行也水流其

止也淵默淵默之與水流天行之與地止
其於不爲而自爾一也今季咸見其尸居
而坐忘即謂之將死覩其神動而天隨因
謂之有生誠應不以心而理自玄符與變
化升降而以世爲量然後足爲物主而順
時無極故非相者所測耳此應帝王之大
意也

疏文象也震動也地以無心而寧靜故以
不動爲地文也萌然寂泊曾不震動無心
自正文類傾頽此是大聖無感之時小巫

○謂之弗活也而壺丘示見義有四重第一示妙本虛凝寂而不動二示垂迹應感動而不寂第三本迹相即動寂一時第四本迹兩忘動寂雙遣此則第一妙本虛凝寂而不動也

三

十一

是殆見吾杜德機也

註德機不發曰杜

疏殆近也杜塞也機動也至德之機關而不發示其凝淡便爲濕灰小巫庸瑣近見於此矣

嘗又與來

疏前者伊妄言我死今時重命令遣更來也

明日又與之見壺子出而謂列子曰幸矣子之先生遇我也有瘳矣全然有生矣

疏此即第二垂迹應感動而不寂示以應容神氣微動既殊槁木全似生平而濫以聖功用爲己力謬言遇我幸矣有瘳也哉吾見其杜權矣

註權機也今乃自覺昨日之所見見其杜

權故謂之將死

疏權機也前時一覩有類濕灰杜塞機權
全無應動今日遇我方待全生小巫寡識
有茲叨濫者也

列子入以告壺子壺子曰曷吾示之以天壤
註天壤之中覆載之功見矣比之地文不
猶外乎此應感之容也

疏壤地也示之以天壤謂示以應動之容
也譬彼兩儀覆載萬物至人應感其義亦
然

名實不入

註任自然而覆載則天機玄應而名利之飾皆爲棄物

疏雖復降迹同塵和光利物而名譽真實曾不入於靈腑也

廿三

十二

而機發於踵

註常在極上起

疏踵本也雖復物感而動不失時宜而此之神機發乎妙本動而常寂

是殆見吾善者機也

註機發而善於彼彼乃見之

疏示其善機應此兩儀季咸見此形容所以謂之爲善全然有生則是見善之謂也嘗又與來明日又與之見壺子出而謂列子曰子之先生不齊吾無得而相焉試齊且復相之

疏此是第三示本跡相即動寂一時夫至人德滿智圓虛心凝照本跡無別動靜不殊其道深玄豈小巫能測聊謂齊其心迹試相之焉不敢的定吉凶故言且復相者

耳

列子入以告壺子壺子曰吾鄉示之以太沖
莫勝

註居太沖之極浩然治心而玄同萬方故
勝負莫得措其間也

卷三

十三

䟽沖虛也莫無也夫聖照玄凝與太虛等
量本跡相即動寂一時初無優劣有何勝
負哉

是殆見吾衡氣機也

註無名不平混然一之以管闔天者莫見

其涯故似不齊

疏衡平也即跡即本無優無劣神氣平等
以此應機小巫近見不能遠測心中迷亂
所以請齊耳

鯢桓之審為淵止水之審為淵流水之審為
淵淵有九名此處三焉

註淵者靜默之謂耳夫水常無心委順外
物故雖流之與止鯢桓之與龍躍常淵然
自若未始失其靜默也夫至人用之則行
捨之則止行止雖異而玄默一焉故略舉

三異以明之雖波疏九變治亂紛如居其極者常淡然自得泊乎忘爲也

疏此舉譬也鯢大魚也桓盤也審也夫水體無心動止隨物或鯨鯢盤極螭龍騰踴或凝湛止住或波流湍激雖復漣漪清淡多種不同而玄默無心其致一也故鯢桓以方衡氣止水以譬地文流水以喻天壤雖復三異而虛照一焉而言淵有九名者也鯢桓止水流水汎水濫水波水雍水文水肥水故謂之九也並出列子波文具載

此略叙有此三焉

嘗又與來

疏欲示極玄應須更召

明日又與之見壺子立未定自失而走

疏李咸前後虞度來相未呈玄遠猶有近

三

十四

見今者第四其道極深本跡兩忘動寂雙
遣聖心行處非凡所測遂使立未安定奔
逸而走

壺子曰追之

疏既見奔逃命令提取

列子追之不及反以報壺子曰已滅矣已失矣吾弗及已

疏驚迫已甚奔馳亦速滅矣失矣莫知所之者也

壺子曰曷吾示之以未始出吾宗

註雖變化無常而常深根寧極也

疏夫妙本玄源窈冥恍惚超茲四句離彼百非不可以心慮知安得以形名取既絕言象無的宗塗不測所由故失而走

吾與之虛而委蛇

○ 註無心而隨物化

不知其誰何

註汎然無所係也

䟽委蛇隨順之貌也至人應物虛已忘懷
隨順逗機不執宗本既不可名目故不知
的是何誰也

卷三

十五

因以爲弟靡因以爲波流故逃也

註變化頽靡世事波流無往而不因也夫
至人一耳然應世變而時動故相者無所
措其目自失而走此明應帝王者無方也

疏頹者放任靡者順從夫上德無心有感
斯應放任不務順從於物而揚波塵往隨
流世間因任前機曾無執滯千變萬化非
相者所知是故季咸宜其逃逸也

然後列子自以爲未始學而歸

疏季咸逃逸之後列子方悟己迷始覺壺
丘道深神巫術淺自知未學請乞其退歸
習尚無爲伏膺玄業也

三年不出爲其妻爨食豕如食人

註忘貴賤也

疏不出三年屏於俗務爲妻孥火忘於榮
辱食豕如人淨穢均等

於事無與親

註唯所遇耳

疏悟於至理故均彼我涉於世事無親疎
也

彫琢復朴

註去華取實

疏彫琢華飾之務悉皆棄除直置任真復
於朴素之道者也

塊然獨以其形立

註外飾去也

䟽塊然無情之貌也外除彫飾內違心智
槁木之形塊然無偶也

紛而封哉

卷三

十六

註雖動而真不散也

䟽封守也雖復涉世紛擾和光接物而守
於真本確爾不移

一以是終

註使物各自終

C
疏動不乖寂雖紛擾而封哉應不離真常
抱一以終始

無爲名尸

註因物則物各自當其名也

疏尸主也身尚忘遺名將安寄故無復爲

名譽之主也

無爲謀府

註使物各自謀也

疏虛淡無心忘懷任物故無復運爲謀慮
於靈府耳

無爲事任

註付物使各自任

已
疏各率素分恣物自爲不復於事任用於

無爲知主

卷三

註無心則物各自主其知也

十七

物
疏忘心絕慮天順群生終不運知以主於

體盡無窮

○ 註因天下之自爲故馳萬物而無窮

○

疏體悟真源故能以智境冥會故曰皆無窮也

而遊無朕

註任物故無迹

疏朕跡也雖遨遊天下接濟蒼生而晦迹韜光故無朕也

盡其所受乎天

註足則止也

疏所稟天性物物不同各盡其能未爲不足者也

而無見得

註見得則不知止

疏夫目視之所見雖見不見得於分內之
得雖得不得既不造意於見得故雖見得
而無見得也

亦虛而已

註不虛則不能任群實

疏所以盡於分內而無見得者自直虛心
忘淡而已

至人之用心若鏡

○ 註鑒物而無情

○ 疏夫懸鏡高堂物來斯照至人虛應其義亦然

不將不迎應而不藏

註來即應去即止

卷三

十八

疏將送也夫物有去來而鏡無迎送來者即照必不隱藏亦猶聖智虛凝無幽不燭物感斯應應不以心既無將迎豈有情於隱匿哉

故能勝物而不傷

註物來乃鑒鑒不以心故雖天下來照而無勞神之累

䟽夫物有生滅而鏡無隱顯故常能照物而物不能傷亦由聖人德合二儀明齊三景鑒照遐廣覆載無偏用心不勞故無損害爲其勝物是以不傷

南海之帝爲儵北海之帝爲忽中央之帝爲渾沌

䟽南海是顯明之方故以儵爲有北是幽闇之域故以忽爲無中央既非北非南故

以混沌爲非無非有者也

儵與忽時相與遇於渾沌之地渾沌待之甚善

疏有無二心會於非無非有之境和二偏心之執爲一中之志故云待之甚善也

卷三

十九

儵與忽謀報渾沌之德曰人皆有七竅以視聽食息此獨無有嘗試鑿之

疏儵忽二人由懷偏滯未能和會尚起學心忘嫌混沌之無心而謂穿鑿之有益也日鑿一竅七日而渾沌死

註爲者敗之

疏夫運四朕以滯境鑿七竅以染塵乖渾
沈之至淳順有無之取舍是以不終天年
中途夭折勗哉學者幸免之焉故郭注云
爲者敗之也

南華真經註疏卷之九

南華真經註疏卷之十

緣四

河 南 郭 象 註

唐 西 華 法 師 成 玄 英 疏

外篇駢拇第八

駢拇枝指出乎性哉而侈於德

疏駢合也大也謂足大拇指與第二指相連合爲一指也枝指者謂手大拇指傍枝生一指成六指也出乎性者謂此駢枝二指並稟自然性命生分中有之侈多也德謂仁義禮智信五德也言曾史稟性有五

○ 德蘊之五藏於性中非剩

附贅縣疣出乎形哉而侈於性

註夫長者不爲有餘短者不爲不足此則駢贅皆出於形性非假物也然駢與不駢其於各足而此獨駢枝則於衆以爲多故

外四

曰侈耳而惑者或云非性因欲割而棄之是道有所不存德有所不載而人有棄才物有棄用也豈是至治之意哉夫物有小大能有少多所大即駢所多即贅駢贅之分物皆有之若莫之任是都棄萬物之性

也

疏附生之贅肉縣係之小疣並稟形以後
方有故出乎形哉而侈性者譬離曠稟性
聰明列之藏府非關假學故無侈性也

多方乎仁義而用之者列於五藏哉而非道

德之正也

註夫與物冥者無多也故多方於仁義者
雖列於五藏然自一家之正耳未能與物
無方而各正性命故曰非道德之正夫方
之少多天下未之有限然少多之差各有

定分豪芒之降即不可以相跂故各守其方則少多無不自得而或者聞多之不足以正少因欲棄多而任少是舉天下而棄之不亦妄乎

疏方道術也言曾史之德性多仁義羅列

聖曰

藏府而施用之此直一家之知未能大冥萬物夫能與物冥者故當非義而應夫仁義不多不少而應夫多少千變萬化與物無窮無所偏執故是道德之正言

是故駢於足者連無用之肉也技於手者樹

無用之指也

註直自性命不得不然非以有用故然也
疏夫駢合之拇無益於行步故雖有此連
終成無用之肉枝生於手指者既不益操
捉故雖樹立此肉終是無用之指也欲明
稟自然天性有之非關助用而生也

多方駢枝於五藏之情者淫僻於仁義之行
註五藏之情直自多方耳而少者橫復尚
之以至淫僻而失至當於體中也

疏夫曾史之徒性多仁義以此情性駢於

藏府性少之類矯性慕之矜此爲行求於
天理既非率性遂成淫僻淫者耽滯僻者
不正之貌

而多方於聰明之用也

註聰明之用各有本分故多方不爲有餘

學四

三

少方不爲不足然情欲之所蕩未嘗不賤
少而貴多也見夫可貴而矯以尚之則自
多於本用而困其自然之性若乃忘其所
貴而保其素分則與性無多而異方俱全
矣

疏言離曠素分多於聰明性少之徒矯情
爲尚以此爲用不亦謬乎

是故駢於明者亂五色淫文章青黃黼黻之
煌煌非乎而離朱是已

䟽斧形謂之黼兩已相背謂之黻五色青

黃赤白黑也青與赤爲文赤與白爲章煌
煌眩目貌也豈非離朱乎是也已助聲也
離朱一名離婁黃帝時明目人百里察毫
毛也

多於聰者亂五聲淫六律金石絲竹黃鍾大

○呂之聲非手而師曠是已

註夫有耳目者未嘗以慕聾盲自困也所困常在於希離慕曠則離曠雖性聰明乃是亂耳目之主也

疏五聲謂宮商角徵羽也六律黃鍾大呂

姑洗蕤賓無射夾鍾之徒是也六律陽六呂陰總十二也金石絲竹匏土革木此八音也非乎言滯著此聲音豈非是師曠乎師曠字子野晉平公樂師極知音律言離曠二子素分聰明庸昧之徒橫生希慕既

失本性寧不困乎然則離曠聰明乃是亂
耳目之主者也

枝於仁者擢德塞性以收名聲使天下簞鼓
以奉不及之法非乎而曾史是已

註夫曾史性長於仁耳而性不長者橫復

學四

四

慕之慕之而仁仁已偽矣天下未嘗慕桀
跖而必慕曾史則曾史之簞鼓天下使失
其真性甚於桀跖也

疏枝於仁者謂素分枝多仁義由如生分
中枝生一指也擢用五德既偏滯邪淫仍
○

○閉塞正性用斯接物以收聚名聲遂使蒼生馳動奔競由如笙簧鼓吹能感動於物欣企也然曾史性長於仁義而不長者橫復慕之捨短効長故言奉不及之法也擢拔謂拔擢僞德塞其真性也曾者姓曾名參字子輿仲尼之弟子史者姓史名鮪字子魚衛靈公臣此二人並稟性仁孝故舉之

駢於辯者纍瓦結繩竄句遊心於堅白同異之間而敝跬譽無用之言非乎而楊墨是已

註夫騁其奇辯致其危辭者未曾容思於
構杌之口而必競辯於楊墨之間則楊墨
乃亂群言之主也

疏揚者姓楊名朱字子居宋人也墨者名
翟亦宋人也為宋大夫以其行墨之道故

墨也

王

稱為墨此二人並墨之徒稟性多辯咸能
致高談危險之辭鼓動物性固執是非由
如緘結藏匿文句使人難解其游心學處
惟在堅執守白之論是非同異之間未始
出非人之域也蹇蹇由自恃也亦用力之

○貌譽光替也揚墨之徒並矜其小學炫耀
衆人誇無用之言惑於群物然則揚墨豈
非亂群之師乎言即此揚墨而已也

故此皆多駢旁枝之道非天下之至正也

註此數子皆師其天性真自多駢旁枝各
自是一家之正耳然以一正萬則萬不正
矣故至正者不以已正天下使天下各得
其正而已

疏言此數子皆自天然聰明仁辯由如合
駢之拇傍生枝指稟之素分豈由人爲故

知率性多仁乃是駢傍枝之道也而愚惑之徒捨己効物求之分外由而不已然搖動物性由此數人以一正萬故非天下至道正理也

彼正正者不失其性命之情

註物各任性乃正正也自此已下觀之至正可見矣

疏以自然之正理正蒼生之性命故言正也物各自得故言不失也言自然者即我之自然所言性命者亦我之性命也豈遠

哉故言正正者以不正而正正而不正之
而言也自此以上明矯性之失自此以下
顯率性之得也

故合者不為駢

註以枝正合乃謂合為駢

錄四

六

而枝者不為跂

註以合正枝乃謂枝為跂

䟽以枝正合乃謂合為駢而合實非駢以
合枝乃謂枝而跂而跂實非跂也

長者不為有餘

註以短正長乃謂長有餘

短者不爲不足

註以長正短乃謂短不足

疏長者謂曾史離曠楊墨並稟之天性蘊蓄仁義聰明俊辯比之群小故謂之長率

性而動故非有餘短者衆人此曾史等不及故謂之短然亦天機自張故非爲不足是故鳧脰雖短續之則憂鶴脰雖長斷之則悲

註各自有正不可以此正彼而損益之

（
跡鳧小鴨也鶴鵠之類也脰脚也自然之
理亭毒衆形雖復脩短不同而形體各足
稱事咸得逍遙而或者方欲截鶴之長續
鳧之短以爲齊深乖造化違失本性所以
憂悲

卷四

故性長非所斷性短非所續無所去憂也

註知其性分非所斷續而任之則無所去
憂而憂自去也

疏夫稟性受形僉有崖量脩短明闇素分
不同此如鳧鶴非所斷續如此即各守分

內雖為無勞去憂憂自去也

意仁義其非人情乎

註夫仁義自是入之情性但當任之耳

彼仁人何其多憂也

註恐仁義非人情而憂之者真可謂多憂也

○
疏噫嗟歎之聲也夫仁義之情出自天理率性有之非由放効彼仁人者則是曾史之徒不體真趣橫生勸獎謂仁義之道可學而成莊生深嗟此迷故發噫歎分外引

物故謂多憂也。非其人情乎？者是人之情性者也。

且夫駢於拇者，決之則泣；枝於手者，斷之則啼。二者或有餘於數，或不足於數，其於憂一也。

註謂之不足，故泣而決之，以爲有餘，故啼而斷之。夫如此，雖群品萬殊，無釋憂之地矣。唯各安其天性，不決駢而斷枝，則曲成而無傷，又何憂哉？

䟽斷者，齧斷也。決者，離析也。有餘於數，謂

枝生六指也不足於數謂駢爲四指夫駢
枝二物自出天然但當任置未爲多少而
或者不能忘淡固執是非謂枝爲有餘駢
爲不足橫欲決駢齕枝成於五數既傷造
化所以泣啼故決齕雖殊其憂一也

緣四

今世之仁人蒿目而憂世之患

註兼愛之迹可尚則天下之目亂矣以可
尚之迹蒿目今有患而遂憂之此爲陷人於
難而後拯之也然今世正謂此爲仁也
䟽蒿目亂也仁兼愛之迹也今世猶末代

言曾史之徒行此兼愛遂令或者捨己効人希幸之路既開耳目之用亂矣耳目亂則患難生於是憂其紛擾還救以仁義不知患難之所興興乎聖迹也

不仁之人決性命之情而饕貴富

註夫貴富所以可饕由有蒿之者也若乃無可尚之迹則人安其分將量力受任豈有決已効彼以饕竊非望哉

疏饕貪財也素分不懷仁義者謂之不仁之人也意在貪求利祿偷竊貴富故絕已

之天性亡失分命真情而矯性僞情舍我
逐物良由聖迹可尚故有斯弊者也是知
抱璞還淳必須絕仁棄義

故意仁義其非人情乎

疏此重結前旨也

卷四

自三代以下者天下何其囂囂也

註夫仁義自是人情也而三代以下橫共
囂囂棄情逐迹如將不及不亦多憂乎

疏自從也三代夏殷周也囂囂猶謹聒也

夫仁義者出自性情而三代已下棄情徇

○迹置器競逐何愚之甚是以夏行仁殷行義周行禮即此器器之狀也

且夫待鉤繩規矩而正者是削其性也

䟽鉤曲繩直規圓矩方也夫物賴鉤繩規矩而後曲直方圓也此非天性也諭人待教迹而後仁義者非真情也夫真率性而動非假學也故矯性偽情舍已効物而行仁義者是減削毀損於天性也

待繩約膠漆而固者是侵其德也

䟽約束縛也固牢也侵傷也德真智也夫

待繩索約束膠漆堅固者斯假外物非真
牢者也喻學曾史而行仁者此矯偽非實
性也既乖本性所以侵傷其德也

屈折禮樂喻仁義以慰天下之心者此失
其常然也

䟽屈曲也折截也喻猶嫗撫也揉直爲
曲施節文之禮折長就短行漫漶之樂嫗
撫偏愛之仁喻執迹之義以此偽真以
慰物心遂使物喪其真人亡其本既而棄
本逐末故失其真常自然之性者也此則

○總結前文之失以生後文之得也

天下有常然常然者曲者不以鉤直者不以繩圓者不以規方者不以矩附離不以膠漆約束不以纆索

疏夫天下萬物各有常分至如蓬曲麻直

德同

首圓足方也水則冬凝而夏釋魚則春聚而秋散斯出自天然非假諸物豈有鉤繩規矩膠漆纆索之可加乎在形既然於性亦爾故知禮樂仁義者亂天之經者也又解附離離依也故漢書云哀帝時附離董

氏者皆起家至二千石注云離依之也

故天下誘然皆生而不知其所以生同焉皆得而不知其所以得

註夫物有常然任而不助則民泯然自得而不自覺也

疏誘然生物稟氣受形或方或圓乍曲乍直亭之毒之各足於性悉莫辨其然皆不知所以豈措意於緣慮情係於得失者乎是知屈折啗俞失其常也

故古今不二不可虧也

○ 註同物故與物無二而常全

○ 疏夫見始終以不一者凡情之闇惑也觀古今之不二者聖智之明照也是以不生而生不知所以生不得而得不知所以得雖復時有古今而法無虧損千變萬化無常唯一

卷四

十一

則仁義又奚連連如膠漆纏索而遊乎道德之間為哉

註任道而得則抱朴獨往連連假物無為其間也

疏奚何也連連猶接續也夫道德者非有
非無不生不滅不可以聖智求安得以形
名取而曾史之類性多於仁以已率物滯
於名教束縛既似絨繩執固又如膠漆心
心相續連連不斷懷挾此行教游道德之
鄉者譬猶以圓學方以魚慕鳥徒希企尚
之名終無功用之實筌蹄不忘魚兔又喪
已陳芻狗貴此何爲也

使天下惑也

註仁義連連祇足以惑物使喪其真

○ 䟽仁義之教聰明之迹垂自然之道亂天下之心

夫小惑易方大惑易性

註夫東西易方於體未虧矜仁尚義失其常然以之死地乃大惑也

䟽夫指南爲北其迷尚小滯迹喪真爲惑更大

何以知其然邪

䟽然如是也此即假設疑問以出後文

自虞氏招仁義以撓天下也天下莫不奔命

於仁義

註夫與物無傷者非爲仁也而仁迹行焉
令萬理皆當者非爲義也而義功見焉故
當而無傷者非仁義之招也然而天下奔
馳棄我殉彼以失其常然故亂心不由於
緣四醜而恒在美色撓世不出於惡而恒由仁
十二義則仁義者撓天下之具也

疏虞氏舜也招取也撓亂也自唐堯以前
猶懷質樸虞舜以後淳風漸散故以仁義
聖迹招慰蒼生遂使宇宙黎元荒迷奔走

喪於性命逐於聖迹

是非以仁義易其性與

註雖虞氏無易之情而天下之性固以易矣

疏由是觀之豈非用仁義聖迹撓亂天下

使天下蒼生棄本逐末而改其天性耶

故嘗試論之自三代以下者天下莫不以物易其性矣

註自三代以上實有無爲之迹無爲之迹亦有爲者之所尚也尚之則失其自然之

素故雖聖人有不得已或以盤夷之事易垂拱之性而況悠悠者哉

疏五帝以上猶肩無爲之風三代以下漸興有爲之教澆淳異世步驟殊時遂使捨已効人易奪真性徇物不反不亦悲乎注

錄四

十三

云或以盤夷之事易垂拱之性者盤夷猶創傷也言夏禹以風櫛雨沐手足胼胝以此辛苦之事易於無爲之業居上既爾下民亦然也

小人則以身殉利士則以身殉名大夫則以

身殉家聖人則以身殉天下

註夫鶉居而穀食鳥行而無章者何惜而
不殉哉故與世常冥唯變所適其迹則殉
世之迹也所遇者或時有盤夷禿脰之變
其迹則傷性之迹也然而雖揮斤八極而
神氣無變手足盤夷而居形者不擾則奚
殉哉無殉也故乃不殉其所殉而迹與世
同殉也

疏殉從也營也求也逐也謂身所以從之
也夫小人貪利廉士重名大夫殉爲一家

帝王營於四海所殉雖異易性則同然聖人與世常冥其迹則殉故有癡瘖禿脛之變而未始累其神者也

故此數子者事業不同名聲異號其於傷性以身爲殉一也

疏數子者則前之世以下四人也事業者謂利名天下不同也名聲者謂小人大夫聖人異號也言此四人事業雖復不同名聲異號也言四人雖復不同其於殘生以身逐物未始不均也

臧與穀二人相與牧羊而俱亡其羊。

疏此仍前舉譬以生後文也。孟子云：臧善學人，穀孺子也。楊雄云：男壻婢曰臧，穀良家子也。牧養也。亡失也。言此二人名耽事業俱失其羊也。

問臧奚事則挾筴讀書，問穀奚事則博塞以遊。二人者事業不同，其於亡羊均也。

疏奚何也。冊簡。古人無紙，皆以簡冊寫書。行五通而投瓊曰博，不投瓊曰塞。問臧問穀，乃有書塞之殊。牧羊亡羊，實無復異也。

伯夷死名於首陽之下盜跖死利於東陵之
上

疏此下合譬也伯夷叔齊並孤竹君之子
也孤竹神農之後也姜姓伯夷名允字公
信叔齊名致字公遠夷長而庶齊幼而嫡
父常愛齊數稱之於夷及其父薨兄弟相
讓不襲先封聞文王有道乃往於周遇武
王伐紂扣馬而諫諫不從走入首陽山採
薇爲糧不食粟遂餓死首陽山山在蒲州
東縣蒲州城南三十里見有夷齊廟墓林

○木森竦盜跖者柳下惠之從弟名跖徒卒九千常爲巨盜故以盜爲名東陵者山名又云即太山也在齊州界去東平十五里跖死其上也

二人者所死不同其於殘生傷性均也

畢丘

十五

跖伯夷徇名死於首陽之下盜跖貪利殞於東陵之上乃名利所徇不同其於殘傷未能相異也

奚必伯夷之是而盜跖之非乎

註天下之所惜者生也今殉之太甚俱殘

其生則所殉是非不足復論

疏據俗而言有美有惡以道觀者何是何
非故盜跖不必非伯夷豈獨是

天下盡殉也彼其所殉仁義也則俗謂之君
子其所殉貨財也則俗謂之小人

疏此總結前文以成後義但道喪日久並
非適當今俗中盡殉豈獨夷跖從於仁義
未始離名逐於貨財固常是利唯名與利
殘生之本即非天理近出俗情君子小人
未可正據也

其殉一也。則有君子焉，有小人焉。若其殘生損性，則盜跖亦伯夷已。又惡取君子小人於其間哉？

註：天下皆以不殘爲善，今均於殘生，則雖所殉不同，不足復計也。夫生矣，爲殘性矣，爲易哉？皆由乎尚無爲之迹也。若知迹之由乎無爲而成，則絕尚去甚，而反冥我極矣。堯桀將均於自得，君子小人奚辯哉？

疏：惡何也？其所殉名利，則有君子小人之殊。若殘生損性，曾無盜跖伯夷之異。此蓋

俗徒到置非關真極於何而取君子於何而辨小人哉言無別也

且夫屬其性乎仁義者雖通如曾史非吾所謂臧也

註以此係彼爲屬屬性於仁殉仁者耳故

集四

十六

不善也

疏屬係也臧善也吾莊生自稱也夫捨己効人得物喪我者流俗之偽情也故係我天性學彼仁義雖通達聖迹如墨翟楊朱乘於本性故非論生之所善也

○屬其性於五味雖通如俞兒非吾所謂臧也

註率性通味乃善

疏孟子云俞兒齊之識味人也尸子云俞兒和薑桂爲人主上食夫自無天素効物得知假令通似俞兒非其善故也

屬其性乎五聲雖通如師曠非吾所謂聰也
屬其性乎五色雖通如離朱非吾所謂明也
註不付之於我而屬之於彼則雖通之如
彼而我已喪矣故各任其耳目之用而不
係於離曠乃聰明也

疏夫離朱師曠稟分聰明率性而能非關
學致今乃矯性偽情捨已効物雖然通達
未足稱善也

吾所謂臧者非仁義之謂也臧於其德而已
矣

註善於自得忘仁而仁

卷四

十七

疏德得也夫達於玄道者不易性以徇者
也豈復執已陳之芻狗治先王之遠廬者
哉故當知其自知得其自得以斯為善不
亦宜乎

吾所謂臧者非所謂仁義之謂也任其性命之情而已矣

。註謂仁義爲善則損身以殉之此於性命還自不仁也身自不仁其如人何故任其性命乃能及人及人而不累於己彼我同於自得斯可謂善也

疏夫曾參史魚楊朱墨翟此四子行仁義者蓋率性任情稟之天命譬彼駢枝非由學得而或者觀曾史之仁義言放効之可成聞離曠之聰明謂庶幾之必致豈知造

物而亭毒之乎哉故王弼注易云不性其情
焉能久行其跂斯之謂也

吾所謂聰者非謂其聞彼也自聞而已矣吾
所謂明者非謂其見彼也自見而已矣

註夫絕離棄曠自任聞見則萬方之聰明
莫不皆全也

疏夫希離慕曠見彼聞他心神馳奔耳目
竭喪此乃愚闇豈曰聰明若聽耳之所聞
視目之所見保分任真不蕩於外者即物
皆聰明也

夫不自見而見彼不得而得彼者是得人之得而不自得其得者也適人之適而不自適其適者也

註此舍已効人者也雖效之若人而已已亡矣

疏夫不能視見之所見而見目即求離朱之明不能知知之所知而役知以慕史魚之義者斯乃偽情學人之得非謂率性自得已得也既而偽學外顯効彼悅人作僞心勞故不自適其適也

夫適人之適而不自適其適雖盜跖與伯夷
是同爲淫僻也

註苟以失性爲淫僻則雖所失之塗異其
於失之一也

䟽淫滯也僻邪也夫保分率性正道也尚
名好勝邪淫也是以捨己逐物開希幸之
路者雖伯夷之善盜跖之惡亦同爲邪僻
也重舉適人之適者此結前生後以超文
勢故也

余愧乎道德是以上不敢爲仁義之操而下

不敢為淫僻之行也

註愧道德之不為謝冥復之無迹故絕操
行忘名利從容吹累遺我忘彼若斯而已
矣

疏夫虛通之道至忘之德絕仁絕義無利

緣四

十九

無名而莊生妙體環中游心物表志操絕
乎仁義心行忘乎是非體自然之無有媿
道德之不為而言上下者顯仁義淫僻之
優劣也而云余愧不敢者示謙也郭注云
從容吹累者從容猶閑放而吹累動而無

心也吹風也累塵猶清風之動微塵輕舉也

南華真經註疏卷之十